



# ATASSUT INATSIARTUNI

---

ATASSUT

UKA 2013/81

Knud Kristiansen

27.11.13

**Inuit Kalaallit Nunaanniit nuuttartut amerliartuinnartut, ilaat pissutissaqangaanngitsumik periaartaatumillu nuuttut eqqarsaatigalugit, pingaartumilli Kalaallit Nunaanniit Danmarkimut inuttut atukkat pissutigalugit nuuttut aallaavigalugit immikkut iliuseqarnissamik alloriartoqassanersoq pillugu oqallittoqarnissaanik siunnersuut.**

(Inatsisartunut ilaasortaq Sara Olsvig, Inuit Ataqtigiit)

Inuit Ataqtigiit sinnerlugit Inatsisartuni ilaasortap Sara Olsvig-ip apeqquteqaat aallaavigalugu oqallisissiaa soqutiginarloq aammalu oqallisigisariaqartoq pillugu ATASSUT-mit makkuninnga oqaaseqaateqassaagut:

ATASSUT tunngaviusumik kiffaanngissutsimik pingaartitsisuuvoq, innuttaasut nunatsinni sumi najugaqarusunnerminnik namminneerlutik aalajangiisinnaanerat sukkulluunniit sernigisaraarput.

Taamaammat uagutsinnut pingaaruteqarluinnarpoq nunatsinni sumiluunniit najugaqarnissamut periarfissat pitsaasuunissaat.

Taamatuttaaq aamma ippoq nunatsinniit nunanut allanut nuukkallarnissamik aalajangersimasut inerterniarnaviangilugit, taamaallaat isumaginiagassatut pingaartitarput tassaavoq angerlaqqinnissaminnut pissutissaat pitsaasuutissallugit.

ATASSUT-mit ilisimaaraarput kalaallit, pingaartumik Danmarkimut nuuttartut assigiinngisitaartorujussuarnik pissuteqartartut, oqaatigeriikkatsitut ilaat ilinniariartortarput, ilaat qallunaamik aappaqalersimallutik nuuttarput, ilaat suliffeqalernermut atatillugu nuuttarput ilaallu nunatsinni inuuniarnerminni ajornartorsiuteqarnertik anigorniarlugu pitsaanerusumik inuuneqalersinnaassasoralutik nuuttarput.



## ATASSUT INATSIARTUNI

---

Ataaserli tassaavoq nammineq kajumissuseq tunngavigalugu, pingaartumik matumani ilinniakkamik ingerlataqarneq imaluunniit suliffimmut atatillugu sumiiffimmiit sumiiffimmut nuuttarnerit, allalu tassaalluni inuuniarnikkut ajornartorsiuteqarneq pissutigalugu allatut iliorsinnaajunnaartutut misigisimalluni nuuttariaqartarneq.

Pingaartumik kingulliit eqqarsaatigalugit inuit Kalaallit Nunaanniit nuuttartut amerliartuinnartutut oqaatiginiarneqartartut pillugit nunatsinni naalackersuinikkut suliaqartut eqqumaffigalugillu iliuuseqarsinnaaffitsigut iliuuseqarfigisarnissaat pingaaruteqarluinnartuusoq ATASSUT-mit isumaqarpugut.

ATASSUT-mit iluarisimaakkatsinnik Danskit Naalackersuisuisa aammalu Kalaallit Nunaanni Naalackersuisut akornanni kalaallit isumaginninnikkut ajornartorsiuteqarlutik nunatsinniit Danmarkimut nuuttartut pillugit ukiut kingulliit ingerlanerini suleqatigiinnerat pitsaanerulerlunilu siunnerfigissaarnerulernikuuvoq, ATASSUT-millu soorunami neriuutigaarput suleqatigiinneq taanna piffissami agertumi annikillisarneqarani nukittorsarneqarumaartoq.

Kalaaleqatitta nunatsinniiginnarnissaat inuiaqatigiillu inerisarneqarneranni peqataanissaat sutigut tamatigut anguniartariaqarparput.

Inuiaqatigiittut pikkorinnerulertariaqarpugut innuttaasut kikkulluunniit qanorluunniillu inissisimagaluartut peqataasutut misigisimatinnissaat aammalu atorfissaqartinneqartutut misigisimatinnissaat.

Tamannalu pitsaanerpaamik angusaqarfigissagutsigu innuttaasut tunngaviumik pisariaqartitaat inuunerminnilu ineriartorfiumik inuuneqarsinnaanissaminnut periarfissaat annertusartuartaqarpavut.

Tassa imaappoq, ilinniarfiit tamatigoortut, suliffissat patajaatsut ataavartullu, angerlarsimaffissaqarnissaq, meeqqerivissaqarnissaq, meeqqat sunngiffimmini ineriartuutaasumik



## ATASSUT INATSIARTUNI

---

sammisassaqartinneqarnissaat, suliffissaaleqisuusimagaanni suliffissaaleqinermit aniguinissamut sakkussanik aallerfissaqarnissaq, suliffissaaleqinerup nalaani pisortanit tapersorsorneqarsinnaanissaq ilarpassuulu ilanngullugit naalackersuinermik suliaqartuusugut sinaakktassarissaartinniartuartariaqarpavut.

ATASSUT-mit arajutsisimanngilarput innuttaasut ilaat, pingaartumik inuusuttut aalajangersimasumik pissuteqanngitsumik isaasalerlugu “misiliillutik” pitsaanerusumik inuuneqalissanasoralutik, pisortanit isumagineqarlualissasoralutik aammalu inissamik piaartumik tunineqassasoralutik nunatsinnit nuuttartut.

Taakkunanga ikigisassaannigitsut ajoraluartumik aalajangersimasumik angerlarsimaffissaqaratik, pisortanit isumaginissaqaratik nalorninarluinnartumik inuulersimanermikkut sakkortuumik inuuneqalersartut allaallu ajornerpaagaangat imigassamik ikiaroorartumillu atonerluisunngorlutik inuunermikkut aqutsisinnaajunnaartartut.

Pisuussut sumiinnersoq qitiutinnagu inuusuttortatsinnut ilaqutariittut aammalu inuiaqatigiittut periarfissiissutigut sukumiisumik nalilersortuartariaqarpavut sutigullu pitsanngorsaasinnaanerput ujjartortuartariaqarpavut minnerunngitsumillu aamma inuusuttortatsinnut erseqqissaatigiartariaqarpavut nunarput qimallugu pilluarnissamik ujjartuineq tunngavigissaanngikkaanni tapersorsortigissaanngikkaannilu ajorluinnartumik kinguneqarsinnaasoq.

Naggataatigut ATASSUT-mit kaammattuutigiinnassavarput naalackersuinermik suliaqartuusugut tamatta sulissutigisariaqarpavut nunatsinniiginnarnissamut tunngavissat pitsaasuunissaat sutigut tamatigut qulakkeersimaniarlugu partiit akimorlugit suleqatigiittuassasugut.

Qujanaq!